



Լիբանանեան Լուրեր

Այսօր Ընթացք Կ'առնեն Երեսփոխանական Պարտադիր Խորհրդակցութիւնները. Նաժիպ Միքաթի Զաւանական Վարչապէ՛տ



Այսօր Լիբանանի մէջ ընթացք կ'առնեն երեսփոխանական պարտադիր խորհրդակցութիւնները նշանակուելիք վարչապետի անուան ընտրութեան մասին է, որուն աւարտին հանրապետութեան Նախագահը ըստ սահմանադրութեան հաշուի առնելէ ետք առկայ կարծիքները կը նշանակէ Նոր վարչապետ:

Մօտիկ աղբիւրներ կը հաղորդեն, որ մինչեւ այս պահը երկրի

Նախկին վարչապետ դարձած Նաժիպ Միքաթի կրնայ նշանակուիլ վարչապետ ստանալով առնուազն 65 քուէներ:

Մինչ կայ որոշ թերահաւատութիւն, թէ Միքաթի պիտի կարողանայ արագօրէն Նոր կառավարութիւն մը կազմել իր նշանակումէն անմիջապէս ետք, կան այլ աղբիւրներ, որոնք կը հաւաստիացնեն, որ Միքաթի եթէ վստահեցնող տուեալներ չունենար, ապա չէր ընդուներ իր անունին շրջանառութեան մէջ դրուիլը:

Միջազգային Լուրեր

Աֆղանիստանի Մէջ Պարետային Ժամ Սահմանուած Է



Աֆղանիստանի իշխանութիւնները թալեպանները զսպելու համար 34 սահանգներէն 31-ին մէջ գիշերային պարետային ժամ սահմանած են: Այս մասին տեղեկացուցած է Tolo News հեռատեսիլային կայանը՝ յղում տալով երկրի Ներքին գործոց Նախարարութեան ներկայացուցիչին, գրած է ՌԻԱ Նովոսի գործակալութիւնը:

Ներկայացուցիչին խօսքերով՝ պարետային ժամը, որ սահմանուած է թալեպաններու

«գործունէութիւնը սահմանափակելու» նպատակով, կը գործէ տեղական ժամանակով 22:00-էն 04:00:

Նշուած է, որ պարետային ժամը չի տարածուիր երկրի 3 սահանգներու վրայ՝ Զապուլ, Նանկարիար եւ Փանճշեր:

Աֆղանիստանի մէջ առճակատում տեղի կ'ունենայ կառավարական զօրքերուն եւ «Թալիպան» շարժման գրոհայիններուն միջեւ, որոնք զգալի տարածքներ գրաւած են գիւղական բնակավայրերու մէջ եւ յարձակումներ սկսած են մեծ քաղաքներուն վրայ:

Հայկական Լուրեր

Փաշինեան - Արտախորհրդարանական Ուժերու Ղեկավարներ Հանդիպում



Վարչապետի պաշտօնակատար՝ Նիկոլ Փաշինեան մասնակցած է արտախորհրդարանական քաղաքական ուժերու հետ համագործակցութեան խորհրդակցական ժողովի առաջին նիստին: Այս մասին յայտնած է Վարչապետի աշխատակազմը:

Նիստին մասնակցած են «Հանրապետութիւն» կուսակցութեան Նախագահ՝ Արամ Սարգսեանը, «Ազատական» կուսակցութեան առաջնորդ՝ Սամուէլ Պապայեանը, «Ալեանս» առաջադիմական կեդրոնամետ կուսակցութեան առաջնորդ՝ Տիգրան Ուրիխանեանը, «Արդար Հայաստան» կուսակցութեան ղեկավար՝ Նորայր Նորիկեանը, «Ինքնիշխան Հայաստան» կուսակցութեան ղեկավար՝ Դաւիթ Սանասարեանը, Հայաստանի երրօրական կուսակցութեան ղեկավար՝ Տիգրան Խզմալեանը, Հայաստանի Զրիստոնէայ-դեմոկրատական կուսակցութեան Նախագահ՝ Լեւոն Շիրինեանը, «Միասնական հայրենիք» կուսակցութեան Նախագահ՝ Միքայէլ Հայրապետեանը, Սոցիալ Դեմոկրատ կուսակցութեան ղեկավար՝ Միքայէլ Հայրապետեանը, Սոցիալ Դեմոկրատ Հնչակեան կուսակցութեան Հայաստանի վարչութեան ատենապետ՝ Սեդրակ Աճեմեանը:

Նիկոլ Փաշինեան ողջունած է ժողովի մասնակիցները եւ մաղթած յաջող ու արդիւնաւետ քննարկումներ:

Վարչապետի պաշտօնակատար՝ Նիկոլ Փաշինեանի եւ արտախորհրդարանական քաղաքական ուժերու ղեկավարներու մասնակցութեամբ յաջորդ նիստը տեղի պիտի ունենայ առաջիկային:

Յարգանքի Տուրք Ճիւան Գասպարեանին

Վարչապետի պաշտօնակատար Նիկոլ Փաշինեանը տիկնոջ՝ Աննա Յակոբեանի հետ «Արամ Խաչատրեան» համերգասրահին մէջ մասնակցած է աշխարհառօշակ տուտուկահար Ճիւան Գասպարեանի վերջին հրաժեշտի արարողութեան: Այս մասին յայտնած են ՀՀ կառավարութեան:

Յիշեցնենք, որ Ճիւան Գասպարեանը մահացած էր 6 Յուլիսին:



Միջազգային Լուրեր

Փաքիստանեան Ուժեր Տեղակայուեցան Աֆղանիստանի Հետ Սահմանին

«Փաքիստանի զինուած ուժերը կ'ուղարկուին աֆղան-փաքիստա-



նեան սահման, որպէսզի կանխեն թալեպաններու առաջխաղացումը դէպի երկիր», յայտնած է Dawn թերթը:

Փաքիստանի ներքին գործոց նախարար՝ Շէյխ Ռաշիտ Ահմէտ ըսած է, որ Փաքիստանը սահմանապահ ոստիկանութիւն տեղափոխած է Աֆղանիստանի հետ սահման՝ իր տարածքը պաշտպանելու համար ոչ միայն թալեպաններէն, այլեւ Աֆղանիստանէն փախչող

փախստականներէն, նահանջող գրոհայիններէն եւ աֆղանական զինուորականներէն:

«Եթէ աֆղանական զօրքերը մտնեն Փաքիստան՝ խուսափելով մարտական գործողութիւններէն, հաւանական է, որ «Թալիպանը» հետեւի իրենց, եւ հակամարտութիւնը տեղափոխուի Փաքիստանի տարածք», - յայտարարած են Փաքիստանի զինուած ուժերու աղբիւրները:

Փութին Ներկայ Եղած Է Ռազմածովային Զօրահանդէսի

ՌԴ Նախագահ Վլատիմիր Փութինը կիրակի ընդունած է Ռազմածովային ուժերու գլխաւոր շքերթը, որ կը

կայանայ Նեւա գետին մէջ: Ինչպէս կը ներկայացնէ ԹԱՍՍ գործակալութիւնը, շքերթին



մասնակցած է 18 նաւ եւ մոթորանաւ, այդ շարքին՝ հրթիռակիր նաւերը, սուզանաւ, հակաակնային պաշտպանութեան եւ այլ ռազմանաւեր:

Երկրի զինուած ուժերու գերագոյն գլխաւոր հրամանատարը այսօր աւելի վաղ մոթորանաւով շրջայց կատարած է նաւերու տեղակայման ափամերձ հատուածով եւ ողջունաղ անձնակազմերը:

Գլխաւոր ռազմածովային շքերթը Ս. Փետրոսպոլսկի մէջ կը կայանայ Ռազմածովային ուժերու օրը, որ այս համընկած է տարի 25 Յուլիսին: Տօնը կը նշուի Յուլիսի վերջին կիրակին: Այս տարի կը կրանայ ռուսական Նաւատորմի 325-ամեակը:

ՅԱՅՏԱՐԱՐՈՒԹԻՒՆ

2-րդ Համահայկական Ճատրակի Մրցաշարք եւ Ճամբար

ՀԲԸՄ-ի Հայկական Համացանցային Համալսարանը եւ Հայաստանի Ճատրակի Ակադեմիան 8-18 տարեկան հայ երիտասարդները կը հրաւիրեն մասնակցելու:

ՃԱՏՐԱԿԻ ՀԱՄԱՀԱՅԿԱԿԱՆ 2-ՐԴ ՄՐՑԱՇԱՐՔԻՆ ԵՒ ՃԱՄԲԱՐԻՆ (PACT), որ պիտի սկսի 26 Յուլիս 2021-ին:

Երկշաբթեայ անվճար եւ առցանց ամառնային ճամբարին կրնան մասնակցիլ անոնք, որոնք կը սիրեն ճատրակը, կ'ուզեն զարգացնել ճատրակային հմտութիւնները կամ մրցիլ այլ խաղողներու հետ:

Ճամբարի առաջին շաբթուան ընթացքին տեղի պիտի ունենան շարք մը ձեռնարկներ, վարպետաց դասեր եւ խաղեր՝ Հայաստանի առաջատար ճատրակորդներու

2 ր Դ Հ Ա Մ Ա Ն Ս Յ Հ Կ Ա Կ Ա Ն
ՃԱՏՐԱԿԻ
Մ Ր Ց Ա Շ Ա Ր Ք Ե Կ Ճ Ա Մ Բ Ա Ր
ՅՈՒԼԻՍ 26 - ՕԳՈՍՏՈՍ 7, 2021

- * Աշխարհասփիւռ հայ երիտասարդները միաւորող առցանց ձեռնարկ
- * Մասնակիցներու տարիք՝ 8-18
- * Մրցանակաբաշխում
- * Մասնակցելու եւ մրցելու համար անմիջապէս արձանագրուեցէք

ԿԱՏԱՐԵՅՔ ԶԵՐ ԶԱՅԸ
ԱՐՁԱՆԱԳՐՈՒԵՅՔ
Արձանագրութիւնը բաց է մինչեւ Յուլիս 30

հետ: Առցանց մրցաշարքը, քանի մը հանգրուանով, տեղի պիտի ունենայ ճամբարի երկրորդ շաբաթուան ընթացքին: Յաղթողներուն անունները պիտի յայտարարուին փակման հանդիսութեան ժամանակ: Ճատրակի համահայկական 2-րդ մրցաշարքը եւ ճամբարի ձեռնարկները տեղի պիտի ունենան հայերէն եւ/կամ անգլերէն լեզուներով:

Արդէն կրնաք արձանագրուիլ <https://www.avc-agbu.org/edu/AVC-PACT/index-why.html>


Մինչեւ Յուլիս 30 ամբողջացուցէք արձանագրութեան յայտը եւ միացէք մրցաշարքի էջին:

Միացէք հայ երիտասարդներու աշխարհասփիւռ համայնքին եւ կատարեցէք Ձեր քայլը:



Պատմութեան Մէջ Այսօր

Ռուպերթ Զոնտախսագով



Ռուպերթ Արգարի Զոնտախսագով (26 Յուլիս 1937, Թիֆլիս, Խորհրդային Ընկերվարական Հանրապետութիւններու Միութիւն - 23 Յունիս 2010, Մոսկուա, Ռուսիա), վրացահայ նկարիչ: Վրացական ԽՍՀ վաստակաւոր նկարիչ: ԽՍՀՄ նկարիչներու միութեան անդամ (1968):

Ռուպերթ Զոնտախսագովը ծնած է 1937 թուականին, Թիֆլիսի մէջ, բժիշկներու ընտանիքի մը: Դպրոցը աւարտելէն յետոյ ընդունուած է Թիֆլիսի գեղարուեստի ակադեմիոյ գեղանկարչութեան բաժնին մէջ, որը աւարտած է 1963 թուականին (Վ. Շուխայելի եւ Ս. Զոպոլաձէի դասարան): Աւարտելէն յետոյ աշխատած է տիգայնի, ներքին ձեւաւորման, գրքային ձեւաւորման բնագաւառի մէջ: 1990-ական թուականներուն Զոնտախսագովի մօտ նկատելի կը դառնան ոճային փոփոխութիւնները՝ գեղանկարները կը դառնան սեւ-սպիտակ, հիմնական ուշադրութիւնը կը կեդրոնանայ առաջնային ձեւերուն վրայ:

Յուցադրուիլ սկսած է 1964 թուականէն: Առաջին ցուցահանդէսը կազմակերպուած է 1989 թուականին, Թիֆլիսի մէջ, այնուհետեւ՝ 2000, 2003 թուականներուն:

2005 թուականէն կը բնակի Մոսկուայի մէջ: 2006 թուականին Ռուսիոյ պետական հումանիտար համալսարանի թանգարանային կեդրոնին մէջ տեղի է կ'ունենայ Զոնտախսագովի «Այլ արուեստ» անհատական ցուցահանդէսը: 1989 թուականին անյատական ցուցահանդէս կ'ունենայ Թիֆլիսի նկարիչներու տան մէջ:

Ստեղծագործութիւնները կը գտնուին Վրաստանի պետական պատկերասրահին, Թիֆլիսի, Երեւանի, Մոսկուայի, Ֆրանսայի, ԱՄՆ-ի, Հոլանտայի, Պելճիքայի, Յունաստանի, Իսրայելի եւ Աւստրիոյ մէջ մասնաւոր հաւաքածոներով:

Ամերիկեան Բարքեր

ԳԵՈՐԳ ԶԵՕՇԿԵՐԵԱՆ
«Չարթոնք»ի Երեց Աշխատակից

Պսակադրութեան մը Անսովոր Շքախումբը . . .

Այս պատմութիւնը մեզի կու գայ Զենաքս Նահանգի Ուիչիթա քաղաքէն: Հոն՝ 23 տարեկան նշանուած երկու ուսուցիչներ (տես նկարը) կ'որոշեն ամուսնանալ եւ իրենց պսակադրութեան շքախումբն համար կը հրաւիրեն իրենց դասարաններու աշակերտները (տես նկարը), որպէս (bridesmaids եւ groomsmen), այսինքն՝ հարսնաքոյր եւ փեսեղքայր . . .



Արդարեւ հարսը՝ Ալեքսանտրա Սթեմբա, հինգերորդ դասարանի ուսուցչուհի է Մըլին Նախակրթարանի մէջ, որ ունի գիտական թեքում: Ան հրաւիրած է իր դասարանի 20 աշակերտ-աշակերտուհիները որ մասնակցին իր պսակադրութեան, որպէս հարսնաքոյր:

Իսկ փեսան՝ Մէյսըն Մքտաուըլ, երրորդ դասարանի ուսուցիչ է Իրիարթ Նախակրթարանի մէջ, որ ունի բնապահպանման թեքում: Ան ալ իր կարգին հրահրած է իր դասարանի 18 աշակերտ-աշակերտուհիները որ մասնակցին իր պսակադրութեան:



Այսպէս՝ աշակերտ-աշակերտուհիներու ընդհանուր թիւը, որ մասնակցած են իրենց ուսուցիչներու պսակադրութեան՝ հասած է 38-ի: Որքան որ տարօրինակ թուի այս երեւոյթը, ան մեծ ընդունելութիւն գտած է վերոյիշեալ քաղաքի բնակչութեան մօտ:

Սովորութիւն է որ պսակադրութեան մը՝ հարսը հրաւիրէ իր մօտիկ ազգականները

կամ ընկերուհիները, որպէս հարսնաքոյր: Ինչպէս նաեւ փեսան ալ հրաւիրէ իր մօտիկ բարեկամները կամ ազգականները, որպէս փեսեղքայր:

Բայց այս պարագային՝ բոլորովին տարբեր բնոյթ մը առած է այդ սովորութիւնը եւ ուսուցիչներուն աշակերտները փոխարինած են աւանդութիւն դարձած այդ հնամաշ սովորութիւնը, մեծ ուրախութիւն պատճառելով փոքրիկ այդ երեխաներուն, ինչպէս նաեւ իրենց ծնողներուն:

Ըստ ինծի, սովորութիւնները պէտք է փոփոխութեան ենթարկուին ատենը մէյ մը՝ որպէսզի նոր երեւոյթներու ծագման առիթ ընծայեն, չէ՞ք խորհիր!

Անկախութեան Տարեդարձը . . .

Միացեալ Նահանգներու անկախութեան 245-րդ տարեդարձը մեծ շուքով տօնուեցաւ այս տարի, Յուլիս ամսուան 4-ին: Մի քանի ակնառու երեւոյթներ ակնյայտ են այս տարեդարձին կապակցութեամբ: Հիմա թոյլ տուէք նշեմ զանոնք:

Հրավառութիւն (Fireworks)

Ամերիկայի մէկ ծայրէն միւսը՝ մեծ քաղաքներու մէջ թէ փոքր, աւանդական այս սովորութիւնը անպայմանօրէն տեղի կ'ունենայ: Երբեմն՝ անհամբեր մարդիկ, չեն սպասէր այդ օրուան եւ մէկ օր առաջ արդեն կը սկսին այդ գործողութեան, որը վտանգաւոր կը դառնայ՝ եթէ ապահովութեան միջոցները ձեռք չառնուին:

Ճամբորդութիւն

Ամերիկացիներ՝ տօնական կարելոր առիթներով, սովոր են ճամբորդելու: Այդ կարելոր առիթներն են Յիշատակի Օրը (Memorial Day), Աշխատանքի Օրը (Labor Day), Գոհաբանութեան Օրը (Thanksgiving Day), Զրիստոսի Ճննդեան Օրը (Christmas) եւ անշուշտ Անկախութեան Օրը (Independence Day):



Պետական տեղեկատուութեանց աղբիւրներ կը նշեն թէ Անկախութեան Տօնին առիթով 43 միլիոն ամերիկացիներ ճամբորդած են, ոմանք օդանաւով եւ անշուշտ ոմանք ալ անձնական ինքնաշարժներով: Այս թիւը շատ աւելի նուազ էր անցեալ տարի, պսակածէ համաճարակին պատճառաւ:

Կերուխում

Հաւաքական թէ ընտանեկան կերուխումը կարծես անհրաժեշտ մէկ մասնիկն է որեւէ տօնակատարութեան: Դաշտագնացութիւններով՝ մարդիկ կը հաւաքուին եւ կերուխումով կը տօնախմբեն յիշատակելի այդ օրը: Իսկ աւանդութիւն դարձած է որ Նիւ Եորք քաղաքի Քոնի Այլընտ շրջանը կազմակերպէ Hot Dog ուտելու մրցում մը, որ կը կոչուի Nathan's Hot Dog Contest:

Այս տարի այդ մրցումին դարձեալ առաջնութիւն շահած է՝ 14-րդ անգամ ըլլալով, Ինտիանա Նահանգէն Ճոլի Զէսթնաթ՝ որ տասը վայրկեանի մէջ կուլ տուած է 76 Hot Dog. Իսկ իգական սեռի առաջնութիւնը շահած է Արիզոնա Նահանգէն Միշել Լէսթօ, որ տասը վայրկեանի մէջ կերած է միայն 30 Hot Dog . . . Կցուած նկարը ցոյց կու տայ առաջնութիւն շահողներն ու անոնց ստացած բաժակները: Մեր սրտագին շնորհաւորութիւնները անոնց եւ ցաւակցութիւնները իրենց բժիշկներուն, եթէ կրցաք կռահել միտքս . . .

Քաղաքականութիւնը Ինքնին Կեանք Է Արդեն

ԲԱԳՐԱՏ ԷՍԴՈՒԳԵԱՆ

2 անագան առիթներ կ'ըլլայ, ու կը հարկադրուիմ թուրքիոյ վարչութիւնը եւ մեր համայնքի ընթացքը իրարու հետ բաղդատելու: Այդ պահուն ակամայ կը մտաբերեմ կետրոջս խօսքը: Ան բողոքելով որդիներուս անարականութեան յաճախ կ'ըսէր. «Մեծ Էջը ինչ որ ընէ, փոքրն ալ նոյնը կ'ընէ»: Իրաւ ալ ինչ զարմանալի նմանութիւններ կան մերօրեայ թուրքիոյ որդեգրած կարգ մը քաղաքականութիւններու եւ մեր համայնքային կեանքի միջեւ: Պսակածէ ժաիրի համավարակի օրերուն կառավարութիւնը յամառօրէն կ'անտեսէր Բժիշկներու Կաճառի խորհուրդները: Մերոնք ալ կը մտմտան դպրոցական խնդիրներու մասին, առանց լսելու ուսուցիչներու կարծիքը: Երկու ուժերն ալ շատ վստահ են թէ իրենք գիտեն ամենալաւը եւ երբեք կարիք չունին այլ միտքեր լսելու: Օրինակի համար Նախագահ Էրտողան ամենայն անփութութեամբ կարծիքներ կը յայտնէ տնտեսագիտութեան մասին, մեծ զարմանք պատճառելով, բոլոր այն մարդկանց, որոնց արդէն մասնագիտութիւնն է տնտեսագիտութիւնը: Այս երեւոյթը ակամայ մտածել կու տայ հասարակական կազմակերպութիւններու դերակատարութիւնը: Իրաւ ալ բոլոր այդ կառոյցները, որոնք պիտի կոչենք միութիւն ինչի՞ կը ծառայեն եթէ իրենց բնագաւառի յատուկ նիւթերու մէջ իսկ ըսելիք խօսք մը պիտի չունենան: Օրինակի համար ահագանգ կը հնչեցուի մեր դպրոցներու երկրաշարժի մը դիմաց անապահով ըլլալու մասին: Եթէ այս համայնքին մէջ ունինք ճարտարապետներու եւ ճարտարագէտներու միութիւն մը ինքնաբերաբար պիտի ակնկալենք որ այդ պնդումը իր ճշգրիտ պատասխանը գտնէ սոյն միութեան յայտարարութիւնով: Սակայն այդ ըսելու պահուն իսկ կ'անդրադառնանք թէ Հայճար ճիշդ ալ այս նիւթին համար ըրած

Եր յայտարարութիւն մը եւ ջրած Եր այս մասին մտահոգութիւն յայտնած կարծիքները: Ահաւասիկ օրինակ մը եւս, ուր վարչայինները կը լսեն միայն իրենց համոզումը հաստատող միտքերը եւ ուշադրութիւն չեն դարձներ հակառակին: Իրենց հիմնադրութեան տարիներուն պոլսահայ համայնքէ ներս շատ կարելոր առաքելութիւն մը ստանձնած էին սանուց միութիւնները: Ինչ ցաւալի է, որ անոնցմէ իւրաքանչիւրը կորսնցուց իր հեղինակութիւնը ենթարկուելով այս կամ այն թաղականութեան կամ խնամակալութեան: Միևնորէ իրենցմէ կ'ակնկալուէր շատ աւելին: Բոլորիս ծանօթ է, որ մեր նման փոքրամասնութիւնները խստիւ կը զգուշանան քաղաքականութենէ: Վտանգաւոր դաշտ մը ըլլալով կը տեսնեն քաղաքականութիւնը եւ զգոյշօրէն կը խուսափին այդ դաշտին մէջ նաւարկելէ: Սակայն կայ շատ յստակ իրողութիւն մը: Կեանքը ամբողջովին քաղաքականութիւն է եւ այդ կամ այն խմբակին քաղաքականութենէ հեռու մնալու ռազմավարութիւնն ալ ինքնին քաղաքականութիւն մըն է: Քաղաքականութիւն մը, որ ձեռնտու է անգամ մը այդ դաշտին մէջ դերակատարութիւն ունեցողներուն համար:

Ահաւասիկ օրինակ մը եւս, Ատրեամանի մէջ ծխախոտի մշակումով զբաղող գիւղացիներ, երբ փորձեցին սահմանափակումներու դէմ իրենց արդիւնաբերութեան իրաւունքը պաշտպանել ենթարկուեցան ոստիկանական բռնութեան եւ բերման ենթարկուելով բանտարկուեցան: Այդ պահուն իրենք միտքով իսկ չէին անցներ քաղաքականութիւն ընելու վարկածը: Բայց անոր սահմանափակողը քաղաքական միտք էր ունէր իր քաղաքական ակնկալութիւնները, որոնք նոյնիսկ հասկնալի չէին խեղճ մշակներու համար:

Պարտինք գիտնալ թէ մենք պէտք է լուծենք մեր խնդիրները, այլ ոչ ուրիշներ:

«Ակօս»

Մշակութային Արձագանգ

Մայր Աթոռ Սուրբ Էջմիածնում Տեղի Ունեցավ Գրքերի Շնորհանդես

Յուլիսի 23-ին Մայր Աթոռ Սուրբ Էջմիածնի «Վաչե եւ Թամար Մանուկեան» Մատենադարանում, բարձր նախագահությամբ Ն.Ս.Օ.Տ.Տ. Գարեգին Երկրորդ Ճայրագոյն Պատրիարք եւ Ամենայն Հայոց Կաթողիկոսի, տեղի ունեցավ «Եկեղեցին եւ սահմանադրական մշակոյթը» խորագրով շնորհանդես:



Ընթացս շնորհանդեսի ներկայացուցին Մայր Աթոռ Սուրբ Էջմիածնի հրատարակչութեան կողմից լոյս ընծայուած «Համաբարբառ Կանոնագիրք Հայոց» ժողովածուն (կազմող՝ Արամ Մարտիրոսեան, պատասխանատու խմբագիր՝ Տ. Շահէ Ժ. վրդ. Անանեան) եւ «Սահմանադրական մշակոյթի արժեքանական ակունքները հայ ժողովրդի հազարամեայ տարեգրութեան ծալքերում» կոլեկտիւ մենագրութիւնը (Հեղինակներ՝ Ազատ Բոգոյեան, Ալեքսան Յակոբեան, Արթուր Վաղարշեան, Արման Եղիազարեան, Արտակ Մովսիսեան, Գագիկ Յարութիւնեան, Գրիգոր Թանանեան, Յարութիւն Մարութեան, Նարինէ Միրզոյեան, պատասխանատու խմբագիրներ՝ Գագիկ Յարութիւնեան, Արտակ Մովսիսեան, Տ. Արարատ քին. Պօղոսեան, Սարգիս Մելքոնեան):



Շնորհանդեսի բացումն ազդարարեց Մայր Աթոռի Մատենադարանի եւ հրատարակչութեան տնօրէն Տ. Արարատ քահանայ Պօղոսեանը: Այնուհետեւ շնորհանդեսի մասնակիցներին իր հայրական օրհնութիւնն ու պատգամը փոխանցեց Ամենայն Հայոց Կաթողիկոսը: Իր խօսքում Նորին Սրբութիւնը մասնաւորապէս նշեց. «Շնորհանդեսի սիրելի մասնակիցներ, Ողջունում ենք ձեզ Մայր Աթոռ Սուրբ



Էջմիածնում՝ աստուածակառոյց նուիրական սրբօրրանում մեր ժողովրդի: Մատենադարանի այս լուսաւոր հարկի ներքոյ համախմբուել ենք Մայր Աթոռում հրատարակուած երկու արժեքաւոր աշխատութիւնների՝ «Սահմանադրական մշակոյթի արժեքանական սկզբունքները հայ ժողովրդի 1000-ամեայ տարեգրութեան ծալքերում» եւ «Համաբարբառ Կանոնագիրք հայոց» գրքերի շնորհանդեսի ուրախ առիթով, որի համար գոհութիւն ենք յայտնում Բարձրեալին: Խնամքով եւ նախանձախնդրութեամբ ստեղծուած այդ գրքերն այսօր դրուած են մեր ժողովրդի սեղանին եւ յանձնուած են յատկապէս իրաւունքի ու պատմութեան ոլորտի մասնագէտների եւ հոգեւոր ու գիտակրթական լայն շրջանակների ուշադրութեանը:



Գրքերի հեղինակները մեր Եկեղեցու արժանաւոր զաւակներ են, հայրենասեր եւ մեր երկրին ու ժողովրդին նուիրուած անձինք, ովքեր հարուստ վաստակ ունեն գիտութեան եւ կրթութեան բնագաւառներում՝ տարիներ ի վեր դասաւանդելով տարբեր բարձրագոյն հաստատութիւններում, նաեւ՝ Գեորգեան հոգեւոր ճեմարանում: Ուրախ ենք, որ այսօր առիթն ունենք Հայրապետական Մեր օրհնութիւնը եւ գնահատանքի խօսքը բերելու ձեզ, մեծարգոյ հեղինակներ,



ինչպէս եւ՝ գրքերի հրատարակման գործում մասնակցութիւն բերած հոգեւորականների ու աշխարհականների: Այս առիթով Մեր մասնաւոր գնահատանքն ենք ցանկանում յայտնել մեծարգոյ տիար Գագիկ Յարութիւնեանին «Սահմանադրական մշակոյթի արժեքանական սկզբունքները հայ ժողովրդի 1000-ամեայ տարեգրութեան ծալքերում» գրքի նախաձեռնութեան եւ հրատարակութեան պատրաստման համար, ինչպէս եւ մեծարգոյ տիար Արամ Մարտիրոսեանին «Համաբարբառ Կանոնագիրք հայոց»-ի կազմութեան համար:



Սիրելիներ, հրատարակուած գրքերն իրենց պարունակով վառ վկայութիւններ են մեր ժողովրդի ստեղծագործ եւ առաջադէմ մտքի: Ծաւալուն այս աշխատութիւնները ներկայացնում են հայ իրականութեան մէջ պատմութեան հնագոյն ժամանակներից ձեւաւորուած օրէնսդրական մշակոյթը՝ խարսխուած մեր ժողովրդի հոգեւոր եւ մտաւոր

ժառանգութեան, քրիստոնէական արժեքների ու աւանդոյների վրայ: Ազգային-եկեղեցական մեր կեանքի կանոնակարգման պատմական փորձառութիւնը, իրաւակարգաւորման սկզբունքները այսօր պիտի օգնեն առաւել ներդաշնակ կազմակերպելու եւ զօրացնելու հոգեւոր եւ պետական մեր կեանքը, առաւել դիւրընթաց դարձնելու օրէնքի վրայ խարսխուած մեր հասարակական կեանքի բնականոն զարգացումը: Արդարեւ, իրաւական պետութիւնը կարող է կառուցուել բարձր իրաւագիտակցութեան հիմքի վրայ, քանզի հանրային ճանաչողութեան առանցքը կազմող իրաւական եւ արժեքային ըմբռնումներն են ձեւաւորում հասարակական վարքագիծը:



Արդարութիւնը եւ իրաւունքը աստուածադիր սկիզբ ունեն եւ Սուրբ Գրքի հիմնական սկզբունքներից են՝ սիրոյ, յոյսի եւ հաւատի հիմնարար արժեքների հետ:



Մշակութային Արձագանգ

Մայր Աթոռ Սուրբ Էջմիածնում Տեղի Ունեցաւ Գրքերի Շնորհանդէս

Սկիզբը Էջ 04

Արդարութիւնը եւ օրինադրութիւնը մեր կեանքում պիտի ամուր մնան ինչպէս սահմանուած օրէքների պահանջով, այնպէս եւ քրիստոնէական սիրոյ ոգով՝ նպաստելով հասարակութեան համախմբմանն ու միաբանութեանը: Հանրութեան համերաշխութիւնը հաստատուն է արդարութեամբ, իրաւունքի եւ օրէքի անխտրական գործադրմամբ եւ վկայութիւնն է տէրուհայատուէր սիրոյ եւ հաւատի դրսեւորման:



Այս արժեքների հիմքով ձեւաւորուել են մեր Եկեղեցու Կանոնագիրքը, դատաստանագրքերը, որոնցով մեր ժողովուրդն առաջնորդուել է նաեւ պետականութեան բացակայութեան պայմաններում՝ պահպանելով իր հաւաքականութիւնը, ինքնութիւնը եւ կազմակերպելով իր ազգային-եկեղեցական կեանքը: Թեմատիկ խմբաւորմամբ հրատարակուած Կանոնագրքի համաբարբառը, կարծում ենք, առաջին քայլն է մեր Եկեղեցու արդի պահանջները բաւարարող Նոր Կանոնագրքի կարեւոր գործի ձեռնարկման ճանապարհին: Ամբողջական եւ արդիական Կանոնագրքի ստեղծումն այսօր օրակարգային է Եկեղեցի-պետութիւն եւ Եկեղեցի-հասարակութիւն փոխյարաբերութիւնները աւանդական եւ ժամանակակից իրողութիւնների հիմքերի վրայ զարգացնելու առումով:



Թող իրաւագիտական բնոյթի այսպիսի կարեւոր աշխատութիւնները հարստացնեն մեր ժողովրդի գիտակրթական անդաստանը՝ ամրապնդելով իրաւունքի



գերակայութեան գիտակցութիւնը ու մեր կեանքում արդարութիւնը եւ բարին հաստատելու նախանձախնդրութիւնը, քանզի, ինչպէս սաղմոսերգուն է ասում՝ Աստուած «դատում է աշխարհն արդարութեամբ և իր ժողովրդին՝ ուղղամտութեամբ» (Սղմ. 9. 9): Հայցում ենք Երկնաւորից քաջառողջութիւն եւ Նոր արգասիքներ՝ գրքերի հեղինակներին: Աստուծոյ օրհնութիւնը բոլորիդ եւ համայն մեր ժողովրդին. ամէն»:



Աշխատութիւնների հրատարակութեան առիթով իր ողջոյնի խօսքն ասաց ՀՀ Սահմանադրական դատարանի նախագահ Արման Դիլանեանը՝ ընդգծելով կատարուած աշխատանքի կարեւորութիւնը: «Սահմանադրական մշակոյթի արժեքականակն ակունքները հայ ժողովրդի հազարամեայ տարեգրութեան ծայքերում» կոչելով մենագրութեան վերաբերեալ բանախօսութեամբ հանդէս եկաւ «Սահմանադրական մշակոյթ» միջազգային վերլուծական կենտրոնի հոգաբարձուների նախագահ, ի.գ.դ., փրոֆեսոր Գագիկ Յարութիւնեանը՝ մասնաւորապէս խօսելով սահմանադրական մշակոյթի ուսումնասիրման տեսլականի եւ հայոց իրաւագիտական մտքի պատմական ժառանգութեան հանրահռչակման անհրաժեշտութեան մասին: Վերջինս նաեւ իր շնորհակալութիւնը յայտնեց Ամենայն Հայոց Կաթողիկոսին կարեւոր այս նախաձեռնութեան իրագործմանը սատարելու եւ այն հովանաւորելու համար:

«Համաբարբառ Կանոնագիրք Հայոց» ժողովածուի ստեղծման, աշխատութեան կարեւորութեան եւ արդի կիրառելիութեան վերաբերեալ բանախօսութեամբ հանդէս եկաւ իրաւագիտութեան պատմութեան փրոֆեսոր Արամ Մարտիրոսեանը



(Սորպոնի համալսարան): Համաբարբառի կազմման սկզբունքների եւ աշխատութեան պատրաստութեան գործում փրոֆեսոր Արամ Մարտիրոսեանի կարեւոր ներդրման մասին խօսեց նաեւ Մայր Աթոռի Միջեկեղեցական յարաբերութիւնների բաժնի պատասխանատու Տ. Շահէ ծայրագոյն վարդապետ Ամանեանը: Շնորհանդէսն ամփոփուեց Ամենայն Հայոց Հայրապետի «Պահպանիչ»



աղօթքով, որին յաջորդեց աւանդական գինեծօնը:

Արցախին Հետ

Ստեփանակերտի Մէջ Դիմաւորեցին Խառն Մենամարտերու(MMA) Յայտնի Հայ Մարզիկները

Ստեփանակերտի մէջ, Յուլիս 23-ին, դիմաւորեցին խառն մենամարտերու յայտնի հայ մարզիկները: Այս մասին կը հաղորդէ Artsakhpress.am: Մարզիկները Յուլիս 23-28 Արցախի մէջ պիտի իրականացնեն ուսումնամարզական հաւաքներ, ինչպէս նաեւ մարզումներ Արցախի MMA հաւաքականի մարզիկներու հետ, հանդիպումներ, վարպետութեան դասեր երիտասարդներու համար:



Արցախի խառն մենամարտերու (MMA) ֆէդերասիոնի նախագահ Գարեգին Աղաբալեանի խօսքով՝ այսօր Արցախ ժամանած են աշխարհի տարբեր վայրերէ՝ Ամերիկայէն, Ուքրանիայէն, Ռուսիայէն:

«Մարզիկները Արցախի մէջ պիտի



իրականացնեն ինքօրեայ ուսումնամարզական հաւաքներ: Նպատակն է ոգեւորել մարզիկները, բարձրացնել մարզիկներու բարոյահոգեբանական եւ արհեստագիտական մակարդակը: Մնացեալ աշխարհահռչակ մարզիկներն ալ, ոգեւորուելով տղաներու օրինակէն, հետեւին անոնց՝ գալով Արցախ», - նշած է Գարեգին Աղաբալեան:



Կորսուած եւ Կորսուող Յողի Մորմոք

ՅԱԿՈԲ ՊԱԼԵԱՆ

Ոչինչ աւելի թանկագին է երկրի վրայ, քան հայրենի հողը: Կ'անցնին բոլոր փառքերն ու բոլոր որոտընդոտ տրգերը, երբ անոնք չեն բխիր հայրենի երկրին ընդերքներէն: Կ'անցնին բոլոր պերճանքներն ու բոլոր պալատներն, երբ շուք չեն ձգեր հայրենի ջրերուն վրայ: Կ'անցնին մարդիկ իրենք, հեռագնաց հովերու պէս, կ'անցնին փոշի ամպերու եւ թեթեւ եղանակներու պէս, եթէ իրենց մագարմատներով չեն խրուած երկրին բուսահողի մէջ: Կ'անցնին եգերքներու վրայ մեր բոլոր կարօտներն իսկ, վասնզի բեղմնաւոր չեն: Ինչ որ կը մնայ՝ մեր բիծաներուն բնիկ բարբառն է, որուն հնչիւններուն մէջէն մարդ ականջը լարելով կրնայ լսել հին հայոց տոհմիկ շեշտը: Վազգէն Շուշանեան

Յայաստանեան կայքի մը վրայ հանդիպեցայ Վազգէն Շուշանեան խորագրի տակ մէջբերուած խօսքին, որ կրնայ համարուիլ հայու քաղաքական առաջադրանք: Հոն արտայայտուած գաղափարներով չդրոշմուած հայը, հայկական կազմակերպութիւնը, կառավարութիւնը, կուսակցութիւնները, ներսի եւ դուրսի Եւրեպիշմընը եւ Ելիդաները, վաղ թէ ուշ, կ'օտարուին:

Մէկ պարբերութեան մէջ ըստուած է ազգի գոյութեանական հիմնականը: Անկեղծ խոստովանութեամբ եւ առանց ինքնարդարացման փորձերու, պետք է Վազգէն Շուշանեանի միտքերը դասաւորել եւ պատասխանել անոնցմէ բխած հարցումներու, առանց բաւարարուելու զգացումով հայ ըլլալու կամ տեղ մը հարիւր տոկոսով հայ եւ հարիւր տոկոսով ֆրանսացի, արաբ, չինացի, գերմանացի ըլլալու ճոռմաբանութեամբ (ինչո՞ւ չշարունակել եւ չաւելցնել՝ թուրք):

Արդարեւ, Հայրենի Հողն է, որ կը պահէ ազգը: Հոն են առհաւական ժառանգութիւնները, լեզուն, աւանդութիւնները, առասպելները: Հոն է, որ բնական մարդը իրաւունք ունի իր հայրերու եւ նախահայրերու կողքին թաղուելու: Հողը կը պահէ հայը, եթէ ան, ինչպէս կ'ընէ Վազգէն Շուշանեան, իր մագարմատները խրած է հայրենի հողի մէջ: Եւ հայրենահանուած Շուշանեան կը թուէ բոլոր ժամանակաւոր եւ մասնակի երեւոյթները եւ յաջողութիւնները, պալատ ու պերճանք, փառք եւ որոտընդոտ տրգեր: Անոնց համար կ'ընէ՝ «կ'անցնին», «բուսահող»ի վրայ չեն, արմատ չեն արձակել:

44օրեայ պատերազմէն ետք, Հայաստան հող կորսնցուցած է, դեռ կրնայ կորսնցնել ալ: Այդ կորուստները պիտի գումարուի՞ն մայրաքաղաք Անիի, Վանի եւ Աղթամարի, Մուշի եւ Սասունի կորուստներուն վրայ: Անոնց տէ՛ր պիտի դառնան այդ հողերուն օտար, հոն արմատ չունեցող ներխուժողներ: Քաղաքական լուրջութիւն է ուրիշի հողը եւ հայրենիքը կոչել սեփական տարածք: Այդպէս կ'ընէ եւ կը յոխորտայ Ազրպեյճանի մենատերը, հետեւելով իր երեք եղբոր՝ Երտողանի՝ քայլերուն, որ Սիւնիքը, Չանգեզուրը, Սեւանը, Նոյնիսկ Երեւանը, կը պատկանին Ազրպեյճանի: Անոր պատմական տարածքն են:

Եթէ այս յայտարարութիւնները մենք կը լսենք, կը լսեն նաեւ այսպէս կոչուած «աշխարհի մեծերը», «ինքնակոչ իրաւարարները», «խաղաղութեան եւ արդարութեան ջատագովները»: Բայց ի՞նչ կ'ընեն: Ինչո՞ւ եւ ո՞ր շահախնդրութեամբ լուռ կը մնան: Մարգարէութիւն չէ. օր մը, իրենց թուամորթեան պատճառով, վտանգը պիտի նստի իրենց շեմին, ինչպէս նստած էր Վիեննայի դռներուն առջեւ, պարիսպներուն տակ: Հիմա, առեւտրական շահերու համար կրնան Նոյնիսկ դաւադրել, այո՛, դաւադրել, որ Հայաստանէն հողեր պոկուին այսպէս կոչուած միջազգային ճանապարհներու համար, խախտելով Հայաստանի հողային տարածքի ամբողջականութիւնը: Միլեառներ կը խոստանան Հայաստանի, այդ խոստումները քաղաքականօրէն անմեղ չեն, անոնց փոխարէն ակնկալութիւն եւ պահանջ ունին, լուծումներ պիտի պարտադրեն: Հայ քաղաքական միտքը եւ ղեկավարութիւնը միլեառներու շլացումէն անդին պետք է նային: Նաեւ ժողովուրդը, այդ շլացումը պետք է գնահատէ միայն դասական դարձած «լաւ ապրելու իրաւունք»ի տեսանկիւնէն դիտելով եւ գնահատելով խոստացուած միլեառները: Եթէ Հայաստանէն իրաւունքներ պիտի խլուին, եթէ Հայաստան հաստատուելիք ճանապարհներու (կոմունիկացիաներ) տերը պիտի չըլլայ, անոնց վերահսկողութիւնը պիտի յանձնուի ուրիշներու, ինչո՞ւ չըսել Հայաստանի եւ հայութեան անթաքոյց թշնամիներուն, կը կորսնցնենք տարածքներ, անկախութիւն, միջազգային կամ թշնամի ուժեր կը տնօրինեն մեր ճակատագիրը:

Ճիշդ է, այդ ճանապարհները Հայաստանի ժողովուրդին համար կրնան ստեղծել աշխատանքներ, զորս չեմ ուզեր թուել: Անոնք այնքա՛ն մանրուք են,



մանրավաճարային, բաղդատած ըլլալիք եւ պահանջուող զիջումներուն: Հողի տիրութեան իրաւունքը պիտի կորսնցնենք ստեղծուելիք նոր համակարգին մէջ:

Արդէն անցեալին սկսած, եւ այսօր 44օրեայ պատերազմի անփառունակ պարտութեան հետեւանքով, թափով շարունակուող արտագաղթը հայրենատիրութիւնը կը չեզոքացնէ, կ'ամլացնէ: Հոս պետք է խորհիլ Վազգէն Շուշանեանի հայրենիք պահելու գիտակցական որակով, երբ կը դադրինք տէր եւ ծառայ ըլլալ: Պետք է կրկին մտածել Վազգէն Շուշանեանի հետ, երբ ան կ'ընէ. «Կ'անցնին մարդիկ իրենք, հեռագնաց հովերու պէս, կ'անցնին փոշի ամպերու եւ թեթեւ եղանակներու պէս, եթէ իրենց մագարմատներով չեն խրուած երկրին բուսահողի մէջ»: Հողը տէր կ'ուզէ:

Հայը ազգը ինքնութիւն է իր հողին վրայ, այլ հողերու վրայ ան բախտաւոր պարագային կ'աճի որպէս տարաշխարհիկ (exotique) բոյս:

Կրնանք ժամանակ մըն ալ հրճուիլ, որ կը տեսնեք, բայց միկնէ՛ք: Վազգէն Շուշանեանի խօսքի վերջին տողերը մահերգութեան իրատեսութիւնը ունին, երբ կ'ընէ. « Ինչ որ կը մնայ՝ մեր բիծաներուն բնիկ բարբառն է, որուն հնչիւններուն մէջէն մարդ ականջը լարելով կրնայ լսել հին հայոց տոհմիկ շեշտը »:

Բիծաները, երեցները, ինչպէս ցարդ ըրին սփիւռքի մէջ, ժամանակ մըն ալ կը պահեն եւ կը փոխանցեն բարբառը, տոհմիկ եւ արդիական կաղապարներու մէջ հնչող հայերէն բառ ու խօսքի տոհմիկ շեշտը, զոր լսելու համար լարուող ականջները պիտի նուազին:

Ոչ միայն ջաջողեցանք հայրենահանուած զանգուածները բերել հայրենիք, որպէսզի անոր բուսահողին վրայ արմատ արձակեն եւ տէր ըլլան հողին, այլ յաջորդական նահանջներով եւ ապիկարութիւններով այդ բուսահողին մէջ արմատ ունեցողները կը լքեն երկիրը եւ կ'երթան այլ երկիրներու տակ լաւ ապրելու իրաւունք նուաճելու:

Հայրենահանուած Վազգէն Շուշանեան հասկցած եւ զգացած է հայրենի հողի ազգի բուսահող ըլլալու կարեւորութիւնը: Ինչո՞ւ չենք յաջողած եւ չենք յաջողիր իր գոյապահպանական իմաստութիւնը դարձնել անմիջականութենէն անդին սաւառնող քաղաքական առաջադրանք. «Կ'անցնին եգերքներու վրայ մեր բոլոր կարօտներն իսկ, վասնզի բեղմնաւոր չեն»:

Արդարեւ, կարօտները եւ սերերը, վարդապետութիւնները, աշխատանքն ու ստեղծագործական միտքը, յաջողութիւն եւ երջանկութիւն, ԲԵՂՄՆԱԴՈՐ են հայրենի հողի վրայ:

Յաճախ պետք է յիշել եւ առանց յոգնելու կրկնել Վիգէն Խեչումեանի «Գիրք Լինելութեան» երկին ազգային մեծ իմաստութիւնը եւ զայն կախել մեր դռներու վրայ. «Օտարի դրանը քեզ կը կոչեն հիւր, որպէսզի չասեն ծառայ»: Կարօտներէ եւ աղմուկներէ տարբեր նուագ:

Ինչո՞ւ «Գիրք Լինելութեան»ը կրկին չի հրատարակուիր, Հայաստան եւ սփիւռքներ, ինչո՞ւ զայն տարբեր լեզուներով չենք հրատարակել, ոչ թէ օտարին առջեւ պարծենալու համար, այլ որպէսզի ան խօսի Նոյնիսկ «բիծա»ներու խօսքին անհաղորդ դարձած նորերուն:

Ինչո՞ւ հայ մտաւորականութիւնը, փոխանակ գեղագիտական-եստեղիկ ճապկումներով հրճուելու, Վիգէն Խեչումեանի տեսլիքի իմաստութեամբ չի գրաւեր բեմը, չի հեռացներ ապագայինը, ապագայնացնողը, եւ չ'առաջնորդեր ժողովուրդը, Հայաստան եւ սփիւռք:

Այլասերած ժողովրդավարութիւն՝ Օքլոքրասի

ՊԻԱՆՔԱ ՍԱՐԸԱՍԼԱՆ

Ըստ հռոմէացի պատմաբան Փոլիպիոսի (Բ.Ա. 208-126), օքլոքրասի ժողովրդավարութեան վերջին փուլն է:

Թէեւ ժողովրդավարութիւնը կը բացատրուի՝ որպէս քաղաքացիներու հաւասար իրաւունք ունեցած կառավարման ձեւ, սակայն, իրականութեան մէջ, անհաւասար մարդիկ կը համարուին հաւասար եւ սա օքլոքրասիի առաջին սերմն է: Եթէ հասարակութեան մը մէջ բնակչութեան աճը կը գերազանցէ կրթութեան մակարդակը, այդ հասարակութեան մեծամասնութիւնը անխուսափելիօրէն կը բաղկանայ անկիրթ մարդոցմ եւ սա օքլոքրասիի առաջին ծիլն է: Անոնք առանց գիտելիքի կ'ունենան գաղափարներ, անոնք հնարաւոր չէ միաւորել, քանի որ անոնք համար գրեթէ անհնար է ընդունիլ այլ գաղափարներ, բացի իրենցինէն: Եթէ կը նախատեսուի այս «թափառական» ամբոխը համախմբել, ապա անհրաժեշտ է գնել անոր անդամներու հասարակաց կետը կամ պէտք է ստեղծել ընդհանուր նպատակ, գաղափար կամ թշնամի: Սա օքլոքրասիի կոճղն է: Զաղաքական իշխանութիւնը ստանձնած անճարակ մեծամասնութիւնով մենք այլեւս կը ստանանք ո՛չ միայն կոճղ, այլ նաեւ ծառ մը եւ անոր իւրաքանչիւր ճիւղը պետական իշխանութեան մէջ կը գտնէ իր տեղը, կ'աճի եւ կը ստանայ տերերէն, որոնք կը ստուերեն կրթուած եւ մտաւորական մարդիկը. սա ալ օքլոքրասիի պտուղն է:

Օքլոքրասիի հիմնական նշաններն են՝ հասարակական-քաղաքական խումբերու իշխանութեան գլուխ գալը, ամբոխավարական տրամադրութիւններու եւ պարզունակ գաղափարներու հասարակութեան պարտադրումը, անօրինութիւն եւ կամայականութիւն հասարակական կեանքի բոլոր ոլորտներու մէջ, ծրագրուած պայմաններու ստեղծումը անկարգութիւններու համար, մարդկային կեանքի արժեքի խախտումը, տնտեսութեան եւ այլ ոլորտներու ճգնաժամային երեւոյթները:

Օքլոքրասիի իշխանութեան մարմինը գայրացած ամբոխն է: «Ամենավատը» կը ղեկավարուի հետեւեալ հիմնական սկզբունքներով. մտաւորականութիւնը եւ այլ կրթուած մարդիկ կ'ենթարկուին աքսորի, նուաստացման կամ ուղղակի ֆիզիքական ոչնչացման: Տպագիր հրապարակումներու, ներկայացումներու, արուեստի գործերու եւ տեղեկատուութեան այլ աղբիւրներու խստիւ արգիւյում, ինչ որ կը խթանէ իշխող «էլիթ»ներու գաղափարներուն աջակցող զանգուածները: Հայեցակարգերու փոխարինում. արդիւնքին՝ այն ինչ, որ նախապէս կը համարուէր պատուաբեր եւ լաւագոյնը, այլեւս կը դառնայ անընդունելի եւ ամօթալի: Անկարգութիւններ, բռնութեան կիրառում եւ այլ շարժումներ կ'իրականացուին առաջնորդներու հրահրմամբ կամ ուղղորդմամբ՝ դժգոհ բազմութեան կամ հեշտութեամբ վերահսկող խումբերու կողմէ: Անպատեցիկութիւնը կը դառնայ ազատութեան հոմանիշը. այն գործողութիւնները, որոնք նախապէս յանցանք կը համարուէին, իրաւական երանգ կը ստանան հանրային արդարադատութեան բարձր գաղափարներու



անուան տակ:

Օքլոքրասիի էապէս բաւական վտանգաւոր երեւոյթ է՝ որպէս իշխանութեան ձեւ: Այդ կը ցանէ քառս, աւերուածութիւն, անօրինականութիւն, անհամերաշխութիւն, ինչ որ երկրի բնակչութեան կեանքը կը մատնէ թնճուկի: Զաղաքացիներու իրաւունքները այլեւս երաշխաւորուած չեն ըլլար, նոյնիսկ անվտանգութիւնը ապահովել կարելի չ'ըլլար:

Պահ մը պատկերացնենք, որ հասարակութեան բոլոր դիրքերը կը բաշխուին վիճակահանութեամբ. օրինակ՝ իր ամբողջ կեանքի ընթացքին ինքնաշարժները վերանորոգած մարդը յանկարծ կը դառնայ գիւղատնտեսութեան նախարար: Դժուար չէ կռահել, որ գիւղատնտեսութեան նախարարութեան հետաքրքրուած հարցերու փլուզման հաւանականութիւնը շատ մեծ է: Յամենայնդէպս, յստակ է, որ ինչու հին գիտնականներ կը հաւատային, թէ ժողովրդավարութիւնը ամենավատ պարագային կը դառնայ օքլոքրասի: Հարկ է նշել, որ օքլոքրասի ամբոխի հզօրութիւնը շեշտող բառ մըն է կամ ժամանակակից իմաստով՝ ոչ-մասնագէտներու կառավարում: Այս պատճառով է, որ ազնուականութիւնը, անոնք կարծիքով պետական կառավարման լաւագոյն ձեւն է, քանի որ այդ մէկը կը կառավարեն խելացի մասնագէտներ: Ինչպէս աստղի մը գոյութեան փուլերը, այս քաղաքական կառուցուածքն ալ նախ կը փայլի, յետոյ կը նուագի անոր ուժականութիւնը, այնուհետեւ կը սկսի աճիլ եւ, ի վերջոյ, կը փլուզուի իր իսկ միջուկի վրայ: Բռնապետութիւնը, երբ իշխանութիւնը կը հաւաքուի «քարիզմաթիկ» եւ «մանիփիլաթիկ» առաջնորդի եւ անոր աջակցող քանի մը հզօր ղեմբերու շուրջ, եղած է օքլոքրասիի ամենայայտնի եւ յաճախ պատահող հետեւանքը պատմութեան ընթացքին:

Լրատուութեան Գործընկեր



ԲԱՆ ՈՒ ԳԻՐ

«Մենք քամիներ շատ ենք տեսել եւ եթէ ցայսօր գոյատեւում ենք, ապա շնորհիւ լոկ այն բանի, որ քամիները թռցրել են մեր գլխարկը, բայց ոչ գլուխը»:

ՊԱՐՈՅՐ ՍԵԼԱԿ



ՄՇԱԿՈՒԹԱՅԻՆ ՕՐԱՑՈՅՑ

26 2021
ՅՈՒԼԻՍ

Կրկ Երկ Երեք Զրեք Հնգ Ուրբ Երբ

				1	2	3
4	5	6	7	8	9	10
11	12	13	14	15	16	17
18	19	20	21	22	23	24
25	26	27	28	29	30	31



ՌԻՇԱՐ ԺԵՐԱՆԵԱՆ
(1921 – 2019)
«Աղթամար»


Միջազգային Լուրեր

Լաւրով Կարելորած Է Մերձ. Արեւելքի Քրիստոնեաներու Անվտանգութեան Հարցը

«Համաշխարհային հանրութիւնը պէտք է յստակ միջոցներ ձեռնարկէ Մերձաւոր Արեւելքի եւ Ափրիկէի հիւսիսի քրիստոնեաներուն հետապնդումները կանխելու համար, անհրաժեշտ է նաեւ միջազգային մակարդակով «բարձրացնել ձայն» յօգուտ այս խնդրի լուծման»: Այս մասին յայտարարած է Ռուսաստանի արտաքին գործոց նախարար՝ Սերգեյ Լաւրովը «Ռուսաստան-24» հեռատեսիլային կայանի տուած հարցազրոյցի ժամանակ, գրած է ԹԱՍՍ գործակալութիւնը:

Նախարարը նշած է, որ ԱԳՆ-ը եւ Ռուսաստանի Ուղղափառ եկեղեցին բազմաթիւ համատեղ նախագիծեր ունին, որոնցմէ ամենէն արդիականներէն է Ափրիկէի հիւսիսի եւ Մերձաւոր Արեւելքի քրիստոնեաներու պաշտպանութեան ուղղուած յստակ քայլերու ընդունումը: Լաւրովի խօսքերով, ԵԱՀԿ եւ ՄԱԿ հարթակներու վրայ արտաքին եկեղեցական յարաբերութիւններու բաժինն հետ միասին կը կատարուի յատուկ համագումար՝ ուղղուած քրիստոնեաներու աջակցութեան:

«Անոր կը մասնակցին գործընկերներ Վատիկանի, Սուրբ Աթոռէն, Հայաստանի, Հունգարիոյ, Պելա-



ռուսիոյ, Լիբանանի եւ այլ երկիրներու արտաքին գործոց նախարարները, որոնք վտանգ կը տեսնեն Մերձաւոր Արեւելքի մէջ քրիստոնեաներուն հետագայ նորմալ, հանգիստ եւ անվտանգ կեանքին մէջ: Անոնցմէ՝ հարկը հազարաւորներ փախած են, երբ այնտեղ սկսած են «ժողովրդավարութիւն» հաստատել: Նախ, Իրաքի, այնուհետեւ Լիպիոյ եւ Սուրիոյ մէջ: Յատկապէս քրիստոնեայ բնակչութիւնը կը տառապի սուրիական հակամարտութենէ: Սուրիոյ Արաբական Հանրապետութիւնը քրիստոնեութեան բնօրրաններէն մէկն է: Անհրաժեշտ է բարձրացնել ձայն յօգուտ անոր, որ համաշխարհային հանրութիւնը ոչ միայն ուշադրութիւն դարձնէ այս խնդրին, այլ նաեւ յստակ միջոցներ ձեռնարկէ քրիստոնեաներու հետապնդումները կանխելու համար», - ըսած է ՌԴ արտաքին գործոց նախարարը:

Վահան Թեքէեան Միջնակարգ Վարժարան

2021 - 2022
Տարեշրջան

70 Ամեակ

Հայեցի ու Ազգային Դաստիարակութիւն

Կրթական Գերազանցութիւն

E-Learning

Interactive Whiteboards

STEAM Classes

Կեանքի Հմտութիւններ

Ուսուցման Կեդրոններ (Learning Centers)

Արտադասարանային Ձեռնարկներ

Կրթաթոշակը Ձրի

(Ապաւինելով միութենական, ազգային եւ բարեսիրական կազմակերպութիւններու նիւթական նեցուկին)

Յանձնաժողով մանրամասնութեան համար դիմել վարժարանի քարտուղարութեան ամէն օր կ.ա. ժամը 9:00-էն 1:00:

www.vahantekyan.com

info@vahantekyan.com

01/260525 - 01/260574

ՀԱՂՈՐԴԱԳՐՈՒԹԻՒՆ



Աբեղայական Անդրանիկ Ս. Պատարագ Լիբանանի Հայոց Թեմի Եկեղեցիներէն Ներս

Ուրախութեամբ կը տեղեկացնենք, որ Կիրակի, Օգոստոս 1, 2021-ին, Մեծի Տանն Կիլիկիոյ Կաթողիկոսութեան միաբանական ուխտի նորած հինգ աբեղաները, իրենց անդրանիկ Ս. Պատարագը պիտի մատուցեն Լիբանանի Հայոց Թեմի հետեւեալ եկեղեցիներէն Ներս .-

Սրբոց Քառասնից Մանկանց Եկեղեցի (**Նոր Մարաշ**)՝
- **Հոգեշնորհ Տէր Երեմիա Աբղ. Տէկիրմենճեան**

Սուրբ Սարգիս Եկեղեցի (**Նոր Սիս**)՝
- **Հոգեշնորհ Տէր Եզրաս Աբղ. Թէնքեճեան**

Սուրբ Յարութիւն Եկեղեցի (**Ռմէլլ**)՝
- **Հոգեշնորհ Տէր Եզեկիէլ Աբղ. Սէլլումեան**

Սուրբ Աստուածածին Եկեղեցի (**Նոր Ատանա**)՝
- **Հոգեշնորհ Տէր Եսայի Աբղ. Էօրտէքեան**

Սրբոց Վարդանանց Եկեղեցի (**Նորաշէն**)՝
- **Հոգեշնորհ Տէր Եղիա Աբղ. Մալխասեան**

Բարեբաւստիկ այս առիթով, սիրով կը հրաւիրենք մեր բարեպաշտ ժողովուրդը ներկայ գտնուելու Հայ Եկեղեցւոյ ծառայական անդաստանէն Ներս մուտք գործող Նորընծայ մեր հինգ աբեղաներու Ս. Պատարագին եւ լսելու անոնց անդրանիկ պատգամը:

ԴԻԻԱՆ ԱԶԳ. ԱՌԱՋՆՈՐԴԱՐԱՆԻ

ՀԱՂՈՐԴԱԳՐՈՒԹԻՒՆ



Կիրակմուտքի Ժամերգութիւն Եւ Կարգ Օրհնութեան Սրբոց Քառասնից Մանկանց Նորոգեալ Եկեղեցւոյ

Ի գիտութիւն հաւատացեալ մեր ժողովուրդին, այսու պաշտօնապէս կը տեղեկացնենք, որ նախագահութեամբ Թեմիս բարեջան Առաջնորդ՝ Գերշ. Տէր Շահէ Աբղ. Փանոսեանի եւ մասնակցութեամբ Թեմիս Քահանայ Հայրերուն, Շաբաթ, Յուլիս 31, 2021-ին, երեկոյեան ժամը 5:00-ին, Սրբոց Քառասնից Մանկանց Եկեղեցւոյ մէջ պիտի կատարուի Կիրակմուտքի Ժամերգութիւն, որու աւարտին, տեղի պիտի ունենայ նաեւ Նորոգեալ Եկեղեցւոյ Օրհնութեան Կարգ:

Սիրով կը հրաւիրենք հաւատացեալ մեր ժողովուրդը ներկայ գտնուելու հոգեպարար արարողութեան:

ԴԻԻԱՆ ԱԶԳ. ԱՌԱՋՆՈՐԴԱՐԱՆԻ